

Ya ikalwan hulat ni apostol Pablo kan Timoteo

Paunan habi

Hata ikalwan hulat ni apostol Pablo kan Timoteo, ay hinulat na hēn atsi ya ha hukulan ha balayan Roma. Atsi ya ha hukulan gawan ha pangitoro nay Mangangêd ya Habi ya tungkol kan Apo Jesu-Cristo. Muwang ni apostol Pablo ya marani yay nan patsên, kabay labay nan tambêng yan hirawên ni Timoteo.

An-ipaihip na kan Timoteo ya kailangan hēn daygêñ hēn mihay ampaghuyo kan Apo Namalyari. Kailangan nan têehêñ ya hinon kairapan ya lumatêng kana. Dapat panay yan manoro hēn kaptêgan ya atsi ha Habi ni Apo Namalyari, haka dapat nan dayuán ya pamakiistorya ya ayn kapukatan.

Kabooan hēn pinakalaman

Umpisan hulat 1:1-2

Pahalamat gawan kan Timoteo haka aral kana 1:3-20

Ya ugali lan mapaypaniwal-an ya tagahuyo ni Apo Jesu-Cristo 2:1-13

Ya pamimiyay ya ampamahigla kan Apo Namalyari 2:14-26

Ya ugali lan tawo no marani yanay pag-orong ni Apo Jesu-Cristo 3:1-9

Aral kan Timoteo 3:10-4:8

Tawlin utoh 4:9-18

Tawlin habi 4:19-22

¹ Hiko hi Pablo ya nag-in mihay apostol ni Apo Jesu-Cristo gawan ha kalabayan ni Apo Namalyari, ya nangiutoh kangko hēn mangitoro hēn tungkol ha biyay ya impangako na, gawan ha pakikimiha tamo kan Apo Jesu-Cristo.

² Anhulatan kata Timoteo, ya anlugurēn ko, hēn nanad sarili kon anak.

An-ihalangin kata ya dyanan ka dayi hēn kap- atêkbēkan nakêm, haka ingalwan ka dayi ni Apo Namalyari ya Tatang tamo, haka ni Panginoon Jesu-Cristo

Ya an-ipagpahalamat ni apostol Pablo

³ Allo-yabi, panay katan an-ihalangin haka an- ipahalamat kan Apo Namalyari, ya anhuyuan ko hēn malinis ya konsinsya, hēn nanad ha pam- aghuyo lan ninuno ko.

⁴ No angkaihipan koy pantolo hēn luwa mo, ay angkalêngêw ako kamo, haka labay-labay katan mahêlêk, ta êmên ako magkamain hēn haday kahiglaan.

⁵ Angkaihipan ko ya boon nakêm kan naniwala kan Apo Jesu-Cristo, hēn nanad ha paniwala hēn ápo mo, hi Loida, haka hēn indo mo, hi Eunice. Sigurado ko etaman ya an-ihundo moy paniwala mo kan Apo Jesu-Cristo.

⁶ Kabay an-ipaihip ko kamo ya magpakahipêg kan manggamit hēn kagalingan ya indin kamo hēn Espiritu ni Apo Namalyari, hēn impalunto koy gamêt ko ha ulo mo, hēn inhalangin kata.*

* ^{1:6} 1 Timoteo 4:14, Dyag 14:23.

7 Paan kan malimo hên manggamit habain ya kagalingan, ta dinyanan na kitamo ni Apo Namalyari hên Espiritu na, ya main kapangyarihan, pamanlugud haka pamagpigel ha sarili.

8 Kabay a mo ikarêng-êy ya pamaptêg mo hên tungkol ha Panginoon tamo. Haka a mo ikarêng-êy ya pangahukul ko, gawan ha panoro kon tungkol kana. Noa, ha kapangyarihan ya pandin ni Apo Namalyari kamo, ha pangitoro mo ya Mangêd ya Habi, ay pagtêéhan mo etaman ya kairapan ya lumatêng kamo.

9 Hiya ya namiligtas kantamo, haka namaihip kantamo hên palokop kitamo kana. Dinyag nay habayto gawan kalabayan na, haka gawan ha ayn kapantag ya ingalo na kantamo, alwan gawan kangêran hên dyag tamo. Hêna na pon dinyag ya hata luta, ay atsi yana ha ihip ni Apo Namalyari ya ingalwan na kitamo gawan ha pakikimiha tamo kan Apo Jesu-Cristo.

10 Babayo amêhêñ ay impamwang ya habaytoy ingalo na ya ayn kapantag, hên impapaltaw ya Mámiligtas di kantamo, yabay ya hi Apo Jesu-Cristo. Hiyay nanambut hên kamatsan, haka hiyay nampamwang hên Mangangêd ya Habi ni Apo Namalyari ya tungkol ha biyaw ya ayn angga.

11 Hikoy pinili na hên mag-in mihay apostol na hên mamipamwang haka mamitoro hên habaytoy Mangêd ya Habi.

12 Gawan pandaygêñ koy impadyag na kangko, ay ampagdusa kina. Noa, a ko an-ikarêng-êy ya hata kairapan, gawan muwang ko yan taganá hi Apo Jesu-Cristo haka ampaniwala ko kana haka

sigurado ko ya maillagan na ya impatsiwala ko kana, angga ha pag-orong na di.

¹³ Ha panoro mo, ipakahundo mon daygén alimbawa, ya pêtêg ya habi ya intoro ko kamo. Manoro ka hên main paniwala, haka pamanlugud ya pan-idin ni Apo Namalyari kantamo, gawan nagpalokop kitamina kan Apo Jesu-Cristo.

¹⁴ Illagan moy kaptégan ya impatsiwala kamo ha hawop nan Espiritu ni Apo Namalyari ya atsi kantamo, ta êmén ya kaptégan ay a mahamutan hên alwan pêtêg ya toro.

¹⁵ Muwang mo ya inalihan akon kaganawan taga-probinsyan Asia haka hilan Figelo boy Hermogènes.

¹⁶ Ingawan dayi ni Panginoon ya pamilya ni Onesiforo, ta kata-ungno yan namahigla kangko haka a na ingkarêng-êy ya pangahukul ko.

¹⁷ Hêñ atsi ya di ha Roma, ay pinakatapol na ko, angga ha natapol na ko.

¹⁸ Muwang mina no ay-êmén na kon hinawpan ha balayan Efeso. Dayi ha pag-orong na di hêñ Panginoon ay ingawan na ya.

2

Hilay ampaniwala kan Apo Jesu-Cristo ay in-alimbawa ha hundaloh haka ha mihay ampaki-halitagtagan ha puwayuan haka ha mihay mahipêg ya mananaman

¹ Timoteo, anak ko, pataniêhêñ ka dayi hêñ ayn kapantag ya ingalo ni Apo Jesu-Cristo.

² Ya toro ko ya nagilam mo ha arapan hêñ kaltan, ay itoro mo ha mapaypaniwäl-an, ya main galing hêñ mamitoro ha kaatag.

3 Pakikwanan mon pagtêêhan ya kairapan, ta hépat ya habayto ha mangêd ya hundaloh ni Apo Jesu-Cristo.

4 Ya mihay hundaloh ay a ampakiêmên ha hinoman ya alwan hépat ha hundaloh, noa, pakikwanan na hên manyag kalabayan hên namili kana hên mag-in hundaloh.

5 Haka no main miha ya ampaki-halitagtagan ha puwayuan, ay a ya makahambut no a ya anhumonol ha patakaran hên hali-tagtagan.

6 Hépat kanan mihay mananaman hên munuman mangwa hên atag na ha pinaghayngêtan na.

7 Pakaihipên moy panhabiên ko, ta ubuhêñ nan ipamulah kamo hên Panginoon ya habayto.

8 A mon liwaan hi Apo Jesu-Cristo, ya biniyay oman, ya mihay kaapo-apoan ni Arin David, ta yabay ya Mangêd ya Habi ya an-ipamwang ko.

9 Gawan panoro kon habayto, ay ampakaranas kinan kairapan. Inggapoh la ko hên nanad ha mihay mapanyag karawakan. Êmbayro man, ay ampibahwag ya habi ni Apo Namalyari, gawan a ma-gapoh ya habi na.

10 Gawan êmbayro, ay pagtêêhan koy kaganawan kairapan, ta êmén ko mahawpan ya hilay pinili ni Apo Namalyari. Ta êmén hila etaman miligtas gawan kan Apo Jesu-Cristo, haka madyanan biyay ya ayn angga hên kalamo na ha langit.

11 Pêtêg ya humonol ya pangahabi.
“No natsi kitamo hên kalamo na, ay mabiyay kitamo hên kalamo na.

12 No pagtêêhan tamoy kairapan, ay mamaala kitamo hên kalamo na. No araêñ tamo ya, ay

araêñ na kitamo etaman.

¹³ Agyan alwa kitamon tapat kana, ay tapat ya,
gawan a malyarin a na daygên ya hinabi
na.”

Ya dapat ugalién hêñ maghuyo kan Apo Jesu-Cristo

¹⁴ Habaytsi ya ipaihip mo kanlan antoroan mo,
haka pakahabyanan mo hila ha arapan ni Apo
Namalyari, ya itêgên lay nay pamihuhubak la, ta
alwan mangêd ya habayto, noa, ikahiran bêngat
hêñ paniwala lan ampanggilam.

¹⁵ Pakikwanan mon mag-in ikahigla ni Apo Na-
malyari, ya mihay mánoro ya ayn ikarêng-êy, ta
mangêd ya panoro na hêñ mantêg habi ni Apo
Namalyari.

¹⁶ Dayuán moy pamakiistorya ya ayn kapukatan
ta habaytoy makapidayo hêñ tawo kan Apo Na-
malyari.

¹⁷ Ta ya pan-itoro la ay nanad hêñ kapadiri ya
hakit ya makaalit. Hilan Himeneo haka hi Fileto
ay kalamo lan ampanoro hêñ habayto.

¹⁸ Marayo hilay na ha kaptêgan ta panhabiên
la, ya nayari ana ya pamabiyay oman ni Apo
Namalyari kanlan natsi. Ha habi lan êmbayro ay
anhiraêñ lay paniwala lan kaatag.

¹⁹ Noa, ya pêtêg ya habi ni Apo Namalyari, ay
a maoman ta nanad yan napah-êy ya tarêk ya
mihay pundasyon ya a matsigê. Haka nakahulat
bayro ya wana, “Muwang hêñ Panginoon no hino
hilay ampagpalokop kana, haka dapat dayuán lay
karawakan.”*

* **2:19** Bilang 16:5.

20 Ha mihay mahlay ya bali, ay alwan panay ginto haka pilak ya gamit la, noa, main etaman hēn dinyag ha kayo haka tagumbid. Ya dinyag hēn ginto haka pilak ay para ha kaluto, noa, ya dinyag ha kayo haka tagumbid ay pan-allo-allo.

21 Êmbayro man, no dayuán tamoy narawak ya toro, ay mag-in kitamo hēn nanad ha dinyag ha ginto haka pilak, ya tawo ya impapawa êmén makahuyo kan Apo Namalyari. Haka hino man ya oras ay nakal-an kitamo, haka hêpat kitamo ha ikakangêd ya dyag.

22 Kabay, dayuán moy narawak ya kalabayan hēn miyawhay ya kulang pon ha kaihipan, ta pakikwanan mon mag-in mahonol kana, ihundo moy paniwala mo, haka pamanlugud mo, haka pamimiyay mo hēn main kapatékbêkan kalamo lan ayn kapintasan, ya ampaniwala ha Panginoon hēn boon nakêm.

23 Dayuán mo ya ayn kapukatan pamakiistorya kanlan pilosopo, ta habaytoy pangubatan hēn hubakan.

24 Alwan hêpat ha ampaghuyo ha Panginoon ya makihubak, noa, ya hêpat kana ay lugurên na ya balang miha. Dapat magaling yan manoro, haka mag-in mapagtêeh.

25 Dapat maaypa ya nakêm nan toroan hilay anhumalanghang kana, ta kayno hawpan hila ni Apo Namalyari hēn paghêhêan hēn talibatokan lay pamanyag kasalanan, haka kikwan patawad ta êmén la maintindihan ya kaptêgan.

26 Ha êmbayro ay mimukat hila, haka mibuhan hila ha hilo ni Satanas, ya nandakêp haka nangipoh kanla.

3

Ya malyari ha pag-orong ni Apo Jesu-Cristo

¹ Pakaihipên yoy hatsi, no marani yanay pag-orong ni Apo Jesu-Cristo, hadyay nay kairapan ya lumatêng.

² Hilay tawo ay mag-in maimot, kamata hên pera, mapagmahlay, mapaglangka, mapaniran kapareho, mapanalanghang ha toa, ayn utang nakêm, ayn galang kan Apo Namalyari,

³ ayn pamanlugud, a mapamatawad, mapamusmus, a mapagpigel ha sarili, matobag, kapatsi hên kangérān,

⁴ mapay-upit, a malilimoên, haka mapagmatagay. A hila manlugud kan Apo Namalyari ta lugurên lay kalabayan la.

⁵ Ampagbabara hila hên main hilan paniwala, noa, ayn ha biyay la, ya kapangyarihan ni Apo Namalyari, gawan a hila pon nagpalokop kana. Kabay dayuán mo hila.

⁶ Ta main ungnoy lalaki kanla ya anhumwên ha balin babayi ya makasalanan, hên manloko kanlan habaytoy babayi ya ayn pamagpigel ha sarili. Angkaakay hilay habaytoy babayi ha hinohino kay na hên ya toro ya labay lan gilamên.

⁷ Panay hila hên ampag-aral ya habaytoy babayi, noa, a la angkaintindihan ya kaptêgan.

⁸ Hilay habaytoy lalaki etaman, no ay-êmên lan hinalanghang hi apo Moises ni Janes haka Jambres,* ay êmbayro êt ay anhalanghangên lay kaptêgan hên habaytoy lalaki ya ampanloko kanlan habaytoy babayi, ta ayn kangérān ha ihip la,

* **3:8** Exodus 7:11, 22.

haka ya paniwala la, ay ayn alagá ha hêlêk ni Apo Namalyari.

⁹ Noa, a lay na maihundo ya pamanyag lan karawakan, ta mamwangan ya balang dyag la, ya êmên ha nalyari kan Janes haka kan Jambres.

Ya utoh ni apostol Pablo kan Timoteo

¹⁰ Noa, hika Timoteo, ay muwang mo ya tungkol ha toro ko, pamimiyay ko, kalabayan ko ha biyay, paniwala ko, pamangênggan ko hêñ ayn huluk, pamanlugud ko, pamagtêëh ko,

¹¹ pamairap la kangko, haka kairapan ko, ya nalyari kangko ha Antioquia, Iconio angga ha Listra. Hadyay pamairap ya tinéêh ko, noa, inlitas ako hêñ Panginoon ha kaganawan hêñ habayto.

¹² Embayron taganá. Balang mabay hêñ mamiyay hêñ nanad ha mihay nagpalokop kan Apo Jesu-Cristo ay pairapan.

¹³ Haka hilay narawak ya tawo boy hilay manloloko ay lalon dumawak, ta inhundo lay pamanloko la, haka hila man ay lokoën.

¹⁴ Noa, hika, Timoteo, ay ihundo moy pamanyag hêñ namwangan mo, ya angkasigurado mo, ta muwang mo no hinoy nanoro hêñ habayto kamo.

¹⁵ Ta ubat hêñ nagkaihip ka, ay muwang mina ya laman hêñ Banal ya Kahulatan ya impahulat ni Apo Namalyari, ya ampangitoro hêñ dann ya palako ha kaligtasan gawan ha paniwala kan Apo Jesu-Cristo.

¹⁶ Ya kaganawan ya nakahulat ha Kahulatan ya impahulat ni Apo Namalyari, ay ubat kana. Kabay maalagá ya habayto ha panoro hêñ kaptêgan, haka êmên itoynung ya mali ya toro, haka

êmén habyanan hilay ampanyag karawakan, haka mapangwaan aral êmén mag-in malinis ya pamimiyay.

¹⁷ Di ha habi na, ay makwa tamo, ya kaganawan ya kailangan tamon tagahuyo na, ta êmén kitamo mag-in hépat, haka panay nakal-an hên manyag kaganawan kangérān ya an-ipadyag na kantamo.

4

Kaatag ya utoh ni apostol Pablo kan Timoteo

¹ Ha pag-orong na di ni Apo Jesu-Cristo hên mamaala, ay hatolan na hilay angkabiyay pon haka hilay natsi. Kabay ha arapan ni Apo Namalyari haka Apo Jesu-Cristo, ay ampakapakihabi ko kamo,

² ya dapat kan panay hên nakal-an hên mampamwang hên habi ni Apo Namalyari agyan hinon oras. Ha panoro mon habaytoy kaptégan, ay dapat mamwangan lan ampanyag karawakan, ya kangérān ya hépat lan daygén. Habyanan mo hilay ampanyag karawakan, hên main kaaypaan nakém, haka pibat-an moy antoroan mo. Patanihêñ mo nakém la.

³ Ta lumatêng ya allo, ay a lay nan gilamén ya kaptégan ya an-itoro tamo. Ta tapolén la hilay ampanoro hên hino-hino kay na hên ya narawak ya toro ya labay lan gilamén.

⁴ A lay nan gilamén ya kaptégan ya ubat kan Apo Namalyari, ta ya gilamén la tana, ay kayabolan hên istorya ya didinyag bat.

⁵ Noa, hika, Timoteo ay paan kan tumalibaha ha hinoman ya angkalyari. Pagtêéhan moy kairapan

ya lumatêng kamo. Ipamwang mo ya Mangangêd ya Habi, haka tuparên moy kaganawan impadyag kamo hên nanad ha hépat ha mihay ampaghuyo kana.

⁶ Hiko etaman, ay marani kinan matsi. Ya biyay ko ay in-átang ya nanad ha inêmén ya intugtug ha arapan ni Apo Namalyari.

⁷ Nanad akon mihay nakihali-tagtagan ha puwayuan ya nilumatêng ha anggaan. Indin koy boon hêkaw ko. Ya pamanhumonol ko ha Panginoon, ay inhundo ko hên main ahig ya paniwala kana.

⁸ Amêhên, ha panambut ko ha pamanhumonol ko kana, ay madyanan akon primyo ha pag-orong na di hên manatol hên main katoynungan. Alwan hikon bêngat ya madyanan primyo, noa, ya balang miha ya ampangênggan ha pag-orong na.

Ya kalabayan ni apostol Pablo

⁹ Pakikwanan mo dayin kamot hên maniraw kangko.

¹⁰ Ta nilakwanan na ko ni Demas gawan angkaridyaan na ya atsi di ha luta, haka dinyag nay kalabayan na hên nammita ya ha balayan Tesalonica. Hi Cresente ay nammita ha probinsyan Galacia, haka hi Tito ay atsi ha probinsyan Dalmacia.

¹¹ Hi Lucas tana ya atsi di hên kalamo ko. Danan mo hi Marcos, ta ilamo mo ya di, ta mahlay ya maihawop na kangko ha pamaghuyo ko ha Panginoon.

¹² In-utoh ko hi Tiquico ha balayan Efeso.

¹³ Ha pammita mo di, ay gêtan mo ya pangkêbêl ko ya imbalag ko kanlan Carpo ha balayan Troas.

Ubuhêñ mon gêtan ya libro ko, lalon laloy na ya dyag ha balat.

¹⁴ Mal-at ya karawakan ya dinyag na kangko ni Alejandro, ya maminday hêñ tanso. Ya Panginoon tanay maghigantsi kana.

¹⁵ Hika man ay kaillag ka kana, ta hadyay halanghang na ha panoro tamo.

¹⁶ Ayn nanawop kangko ha pamakidungot ha manuyon kasó hêñ haton unan in-arap ako. Mimiha ko tana, ta naubuh la kon nilakwanan. Patawarêñ hila dayi ni Apo Namalyari.

¹⁷ Noa, nilamoan ako ni Panginoon, haka na ko dinyanan hêñ nataniêh ya ihip ta êmêñ ko naipamwang ya kabooan hêñ Mangêd ya Habi ni Apo Namalyari, kanlan alwan Israelita bayri, ya hilay a pon nagpalokop kana. Inligtas na ko ha kamatsan.

¹⁸ Haka iligtas na kon Panginoon ha kaganawan karawakan ta iatêl na ko ha pamanlokop na ha langit. Purién ya hêñ ayn angga. Amen.

Tawlin pangumusta

¹⁹ Ikumusta mo ko ha loway mitaahawa, hi Priscila haka hi Aquila, haka ya boon pamilya ni Onesiforo.

²⁰ Nabalag hi Erasto ha balayan Corinto. Hi Trofimo etaman, ay imbalag ko ha balayan Mileto gawan main yan hakit.

²¹ Pakikwanan mon makalatêng di, bayo lumatêng ya panaon hêñ kêbêl. Angkumustaêñ la ka ni Eubulo, Pudente, Lino, Claudia, haka hilay kaatag pon ya patêl ha Panginoon ya atsi di.

²² Panay na ka dayin lamoan hêñ Panginoon. Haka dayi ingalwan na kaw ngan.

Ya habi ni apo namalyari: Bayon tsipan - Ayta Mag-antsi New Testament in Ayta, Mag-antsi

copyright © 2006 Wycliffe Bible Translators, Inc.

Language: Mag-antsi Ayta (Ayta, Mag-antsi)

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789718260654

The New Testament

in Ayta, Mag-antsi

© 2006, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 18 Apr 2025 from source files
dated 29 Jan 2022

d2289d90-e8af-5f04-a1e1-312fd0921aff